

66. gr.

Fastráðnir starfsmenn.

Um starfskjör, réttindi og skyldur starfsmanna bæjarins fer eftir ákvæðum kjarasamninga hverju sinni og/eða ákvæðum ráðningarsamninga, reglum um ábyrgðarmörk, starfsmannastefnu og jafnréttisáætlun.

67. gr.

Lausráðnir starfsmenn.

Um ráðningu lausráðinna starfsmanna fer eftir reglum sem bæjarstjórn setur. Um kaup og kjör fer eftir kjarasamningum viðkomandi stéttarféлага.

Samþykkt þessi, sem bæjarstjórn Fjarðabyggðar hefur sett samkvæmt ákvæðum 10. gr. og 25. gr. sveitarstjórnarlaga nr. 45/1998, staðfestist hér með til að öðlast þegar gildi. Jafnframt fellur úr gildi samþykkt um stjórn Fjarðabyggðar og fundarskóp bæjarstjórnar nr. 418/1998, með síðari breytingum.

Félagsmálaráðuneytinu, 21. janúar 2002.

F. h. r.

Húnbogi Þorsteinsson.

Guðjón Bragason.

REGLUR

um almenna heimild til að reka fjarskiptanet eða fjarskiptaþjónustu.

1. gr.

Aðilar sem heimildin nær til.

Einstaklingum eða lögaðilum sem staðfestu hafa innan Evrópska efnahagssvæðisins eða í aðildarríki Alþjóðaviðskiptastofnunarinnar og uppfylla skilyrði fjarskiptalaga, er heimilt að reka fjarskiptanet og/eða fjarskiptaþjónustu skv. heimild þessari, með eftirfarandi skilyrðum, enda tilkynni þeir Póst- og fjarskiptastofnun um fyrirhugaða starfsemi sína a.m.k. fjórum vikum áður en starfsemi hefst, sbr. 4. og 5. gr. laga nr. 107/1999, um fjarskipti.

2. gr.

Starfsemi sem fellur utan almennrar heimildar.

Almenn heimild nægir ekki þegar:

- fjarskiptafyrirtæki ætlar að veita almenna talsímaþjónustu,
- óskað er afnota af tíðnum eða númerum,
- óskað er sérstakra réttinda að því er varðar aðgang að almenningum, afréttum og eignarlöndum,
- Póst- og fjarskiptastofnun ákveður að leggja á skyldur til að veita almenna fjarskiptaþjónustu og reka almenn fjarskiptanet, þar á meðal skyldu til að veita alþjónustu og aðrar skyldur samkvæmt reglum um opinn aðgang að netum,
- Póst- og fjarskiptastofnun ákveður að leggja verði á sérstakar skyldur vegna almennra samkeppnisreglna og fjarskiptafyrirtæki hefur umtalsverða markaðshlutdeild að því er varðar almenn fjarskiptanet og almenna fjarskiptaþjónustu.

3. gr.

Tilkynning um fyrirhugaða starfsemi.

Tilkynning um fyrirhugaða starfsemi skal innihalda:

- a. nafn, kennitölu, starfsstöð, símanúmer, faxnúmer og netfang viðkomandi fjarskiptafyrirtækis,
- b. nafn, kennitölu, heimilisfang, símanúmer, faxnúmer og netfang fyrirsvarsmanns fjarskiptafyrirækisins,
- c. greinargóða lýsingu á fyrirhugaðri starfsemi og fjarskiptavirkjum fyrirtækisins,
- d. nöfn þeirra sem eiga 5% hlut eða meira í fyrirtækinu,
- e. yfirlýsingu um að fyrirtækið ætli sér að starfa samkvæmt almennri heimild og virða þau skilyrði sem henni fylgja samkvæmt þessum reglum.

4. gr.

Skráning hjá Póst- og fjarskiptastofnun.

Póst- og fjarskiptastofnun skal tilkynna fjarskiptafyrirtæki eigi síðar en 4 vikum eftir móttöku fullnægjandi tilkynningar, hvort fyrirtækinu er heimilt að starfa samkvæmt heimild þessari eða hvort setja þarf því sérstök skilyrði með útgáfu rekstrarleyfis, sbr. 7. og 8. gr. laga nr. 107/1999.

Ef fyrirtæki fullnægir skilyrðum til að starfa samkvæmt almennri heimild er það fært á skrá Póst- og fjarskiptastofnunar yfir fjarskiptafyrirtæki, þegar skráningargjald hefur verið greitt.

5. gr.

Upplýsingaskylda og eftirlitsúrræði Póst- og fjarskiptastofnunar.

Fjarskiptafyrirtæki skal sæta eftirliti með starfsemi sinni og fjárhag af hálfu Póst- og fjarskiptastofnunar, eins og nánar er kveðið á um í 4. gr. laga um Póst og fjarskiptastofnun nr. 110/1999. Póst- og fjarskiptastofnun er enn fremur heimilt að grípa til úrræða sem kveðið er á um í 5. gr. laga nr. 110/1999, þ.e. að krefjast allra upplýsinga sem nauðsynlegar þykja við athugun einstakra mála. Upplýsingar þessar skulu veittar munnlega eða skriflega allt eftir ákvörðun Póst- og fjarskiptastofnunar og innan þeirra tímamarka sem hún setur.

Sem hluti af eftirliti með starfsemi fjarskiptafyrirtækis og fjárhagsstöðu getur Póst- og fjarskiptastofnun krafist þess að það afhendi henni ársreikninga, milliuppgjör, greinargerðir endurskoðenda fyrirtækisins og aðrar sambærilegar upplýsingar. Ef Póst- og fjarskiptastofnun metur fjárhagsstöðu fjarskiptafyrirtækis slíka að því kunni hugsanlega að vera ókleift að fullnægja skilyrðum heimildar þessarar getur hún krafist umbóta á henni fyrir tiltekinn tíma.

Póst- og fjarskiptastofnun getur við rannsókn máls gert nauðsynlegar athuganir á starfsstað fjarskiptafyrirtækis og lagt hald á gögn þegar ríkar ástæður eru til að ætla að brotið hafi verið gegn lögum um fjarskipti eða um Póst- og fjarskiptastofnun, reglum eða ákvörðunum stofnunarinnar. Við þessar aðgerðir skal fylgja ákvæðum laga um meðferð opinberra mála um leit og hald á munum.

Fjarskiptafyrirtæki skal láta Póst- og fjarskiptastofnun í té allar þær tölfræðilegu upplýsingar sem stofnunin telur nauðsynlegt að safna í þeim tilgangi að fylgjast með þróun á fjarskiptamörkuðum, t.d. upplýsingar varðandi fjölda notenda, stærð fjarskiptaneta, umferð um fjarskiptanet, fjölda bilana, fjölda kvartana, notendagjöld, tekjur, útgjöld og fjárfestingar. Póst- og fjarskiptastofnun mun í þessum tilgangi senda út spurningalista með reglulegu millibili og ber fjarskiptafyrirtæki að svara þeim innan þess tíma sem Póst- og fjarskiptastofnun ákveður.

Fjarskiptafyrirtæki skal tilkynna Póst- og fjarskiptastofnun ef breyting er gerð á nafni þess, heimilisfangi eða fyrirsvari.

Fjarskiptafyrirtæki skal tilkynna Póst- og fjarskiptastofnun um breytingar á eignaraðild að fyrirtækinu ef um er að ræða 5% hlutafjár eða meira. Fjarskiptafyrirtæki skal veita Póst- og fjarskiptastofnun aðgang að hlutaskrá fyrirtækisins þegar þess er óskað.

Fjarskiptafyrirtæki skal tilkynna Póst- og fjarskiptastofnun um eignaraðild sína að öðrum fjarskiptafyrirtækjum og allar breytingar þar að lútandi skulu tilkynntar jafnóðum.

6. gr.

Fjarskiptavirki.

Fjarskiptafyrirtæki er heimilt að setja upp fjarskiptavirki sem hluta af fjarskiptanetum sínum, sbr. 1. gr., án sérstakrar heimildar hverju sinni, sjá þó ákvæði 7. gr. um radióstöðvar og sambönd.

7. gr.

Radióstöðvar og sambönd.

Uppsetning hvers konar radiókerfa þ.m.t. radióstöðva og radiósambanda sem eru leyfisskyld samkvæmt lögum og reglum er háð stöðvar- eða tækjabúnaðarleyfi sem Póst- og fjarskiptastofnun veitir að fenginni umsókn frá fjarskiptafyrirtæki. Í umsóknum skal tilgreina allar breytur fyrir viðkomandi radióstöð eða samband þ.m.t. staðsetningu, tegund og hæð loftnets, sendistyrk og ráðgerða notkun.

Fjarskiptafyrirtæki skal einungis nota þær tíðnir til starfrækslu á fjarskiptanetum sem það hefur fengið úthlutað hjá Póst- og fjarskiptastofnun og greiða fyrir þær úthlutanir í samræmi við gjaldskrá stofnunarinnar.

8. gr.

Truflanir.

Fjarskiptafyrirtæki skal tryggja að fjarskiptavirki í þess umráðum valdi ekki skaðlegum truflunum á öðrum löglegum kerfum.

Fjarskiptafyrirtæki ber að tilkynna Póst- og fjarskiptastofnun um þær truflanir sem því eru kunnar hvort sem þær eru af völdum þess kerfis eða á því.

Póst- og fjarskiptastofnun getur gert kröfur um breytingar á fjarskiptavirkjum í því skyni að girða fyrir vanda vegna truflana. Fjarskiptafyrirtæki skal fyrir eigin reikning hlíta fyrir mælum Póst- og fjarskiptastofnunar um að bæta úr truflanavanda sem stafar af fjarskiptakerfum þess.

Póst- og fjarskiptastofnun getur látið innsigla fjarskiptavirki, sem valda alvarlegum truflunum eða bannað notkun þeirra, sbr. 50. gr. laga um fjarskipti nr. 107/1999.

Ef um verulegar og skaðlegar truflanir er að ræða sem ekki reynist unnt að koma í veg fyrir getur Póst- og fjarskiptastofnun afturkallað heimild til fjarskiptastarfsemi og stöðvað rekstur fjarskiptafyrirtækis.

9. gr.

Tæknistaðlar.

Búnaður fjarskiptafyrirtækis skal vera í samræmi við evrópska staðla sem gerðir eru af ETSI, fjarskiptastaðlastofnun Evrópu eða aðra staðla sem Póst- og fjarskiptastofnun mælir fyrir um.

10. gr.

Bókhaldsleg aðgreining.

Sá þáttur starfsemi fjarskiptafyrirtækis sem heimild þessi tekur til skal vera bókhaldslega aðskilinn frá annarri starfsemi.

Aðgreining í bókhaldi skal vera í samræmi við reglugerð um bókhaldslega og fjárhagslega aðgreiningu í rekstri fjarskiptafyrirtækja nr. 960/2001.

11. gr.

Skráning og meðferð upplýsinga.

Ekki skal nota upplýsingar um notendur í öðrum tilgangi en að skrá þá, veita þeim þjónustu og til reikningagerðar nema með skriflegu samþykki viðkomandi.

Skráning og vinnsla upplýsinga um notendur skal vera í samræmi við lög um Persónuvernd nr. 77/2000 og í samræmi við reglugerð sem samgönguráðherra er heimilað að setja skv. 2. mgr. 30. gr. laga nr. 107/1999.

12. gr.

Skilmálar og gjaldskrár.

Fjarskiptafyrirtæki skulu hafa opna starfsstöð þar sem skilmálar og gjaldskrár þess liggja frammi til afhendingar eigi síðar en þau taka gildi.

Í skilmálum fjarskiptafyrirtækis skulu koma fram, auk almennra skilmála, þær gæðakröfur sem það setur sér varðandi tímamörk á tengingu og viðgerðum og aðrir þættir sem snerta afnot notenda af þjónustu fyrirtækisins svo sem fyrirkomulag endurgreiðslu eða bóta ef umsamin þjónusta er ekki veitt og meginatriði reglna um lausn ágreinings varðandi þjónustuna.

Fjarskiptafyrirtæki skal leggja fram hjá Póst- og fjarskiptastofnun skilmála og gjaldskrár og breytingar á þeim, eigi síðar en við gildistöku þeirra.

Fjarskiptafyrirtæki skal verða við öllum lögmætum beiðnum um áskrift að þjónustu sinni með sanngjörnum og jafnræðislegum hætti. Ekki skal neita aðila um að gerast áskrifandi nema lögmætar ástæður séu fyrir hendi. Fjarskiptafyrirtæki skal útbúa þjónustusamning þar sem tiltekið er hvaða þjónusta verður veitt eða að öðrum kosti vísað í viðeigandi skilmála. Póst- og fjarskiptastofnun getur krafist breytinga á þjónustusamningi ef talið er að ákvæði hans samræmist ekki lögum og reglum.

Í gjaldskrá fjarskiptafyrirtækis skal gæta jafnræðis. Gjöld mega ekki hindra samkeppni.

Reikningar sem notendur fá fyrir þjónustu skulu vera þeim að kostnaðarlausu ef þeir eru einungis sundurliðaðir eftir þjónustu. Við reikningagerð skal hafa að markmiði að reikningsupphæðir séu eins nákvæmar og kostur er.

13. gr.

Sameiginleg afnot.

Í þeim tilfellum sem fjarskiptafyrirtæki hefur rétt til að staðsetja fjarskiptavirki á afréttum, almenningi eða eignarlöndum eða getur tekið eign eignarnámi skv. 48. gr. laga nr. 107/1999, getur Póst- og fjarskiptastofnun ákveðið að fjarskiptafyrirtækið skuli veita öðrum fjarskiptafyrirtækjum aðgang að aðstöðu sinni á því svæði sem um ræðir ef það er tæknilega mögulegt. Fjarskiptafyrirtæki skal upplýsa Póst- og fjarskiptastofnun um fyrirhugaðar framkvæmdir í ofangreindum tilvikum.

Póst- og fjarskiptastofnun getur mælt fyrir um samnýtingu á aðstöðu í öðrum tilfellum vegna sérstakra landfræðilegra aðstæðna eða umhverfissjónarmiða.

14. gr.

Framlag til jöfnunarsjóðs.

Fjarskiptafyrirtækjum er skylt að greiða framlag til jöfnunarsjóðs alþjónustu skv. 15. gr. laga um fjarskipti nr. 107/1999, sbr. lög nr. 145/2001.

15. gr.

Samtengingarsamningar.

Fjarskiptafyrirtæki skal senda Póst- og fjarskiptastofnun afrit af öllum samningum sem það gerir um samtengingu neta. Afritið skal berast innan viku frá undirritun samnings. Póst-

og fjarskiptastofnun er heimilt að birta öllum hagsmunaaðilum upplýsingar um efni samnings eða samninginn í heild sinni. Telji fjarskiptafyrirtæki að einhverjir hlutar samnings skuli vera undanþegnir birtingu vegna viðskiptahagsmuna samningsaðila ber að tilkynna það og rökstyðja um leið og afrit samningsins er sent. Póst- og fjarskiptastofnun ákveður hvaða hlutar samnings skuli birtir.

16. gr.

Leynd fjarskipta.

Fjarskiptafyrirtæki skal tryggja að leyndar sé gætt í fjarskiptum í samræmi við viðkomandi löggjöf á Íslandi.

17. gr.

Fjarskipti á hættutímum.

Fjarskiptafyrirtæki skal á hættutímum í samræmi við fyrirmæli samgönguráðherra tryggja og viðhalda eða stöðva fjarskipti í samræmi við 53. gr. laga nr. 107/1999.

18. gr.

Hlerun.

Fjarskiptafyrirtæki skal, á eigin kostnað, tryggja möguleika á löglegri hlerun í fjarskiptanetum sínum.

19. gr.

Alþjóðlegar skyldur.

Fjarskiptafyrirtæki skal haga starfsemi sinni í samræmi við tilskipanir og reglur sem gilda á Evrópska efnahagssvæðinu, sbr. lög um Evrópska efnahagssvæðið og þær skuldbindingar sem Ísland undirgengst samkvæmt gildandi alþjóðasamningum á sviði fjarskiptamála.

20. gr.

Gjöld.

Um gjöld sem fjarskiptafyrirtæki ber að greiða til Póst- og fjarskiptastofnunar fer samkvæmt 11. gr. laga um Póst- og fjarskiptastofnun nr. 110/1999 og gjaldskrá Póst- og fjarskiptastofnunar.

Skráningargjald skal greitt samkvæmt 11. gr. laga um Póst- og fjarskiptastofnun nr. 110/1999, sbr. lög um aukatekjur ríkissjóðs nr. 88/1991. Skráningargjaldið skal innt af hendi áður en skráningu er lokið.

Vegna álagningar rekstrargjalds skv. 4. mgr., sbr. 8. mgr. 11. gr. laga 110/1999 ber fjarskiptafyrirtæki að senda Póst- og fjarskiptastofnun áætlun um tekjur af starfsemi sem fellur undir heimild þessa á hverju ári eigi síðar en 8. janúar árið eftir. Að loknum almennum framtalsfresti skv. lögum 75/1981 skal fjarskiptafyrirtæki senda Póst- og fjarskiptastofnun veltutölur að nýju og gera grein fyrir breytingum ef einhverjar eru frá fyrri tölum.

21. gr.

Breytingar á skilyrðum.

Póst- og fjarskiptastofnun er heimilt að breyta skilyrðum heimildar þessarar til samræmis við breytingar á lögum og reglugerðum og þegar alþjóðasamningar gefa tilefni til slíks. Sé slík breyting fyrirhuguð skal tilkynnt um það með minnst eins mánaðar fyrirvara og skal skráðum fjarskiptafyrirtækjum gefinn kostur á að tjá sig um fyrirhugaða breytingu. Leiði breytingar til skerðinga á réttindum skráðs fjarskiptafyrirtækis samkvæmt heimild þessari öðlast það ekki rétt til skaðabóta vegna slíkra skerðinga.

22. gr.

Brottfall heimildar.

Póst- og fjarskiptastofnun getur afturkallað heimild ef skráð fjarskiptafyrirtæki stendur ekki í skilum með greiðslur gagnvart Póst- og fjarskiptastofnun, er veitt greiðslustöðvun eða verður gjaldþrota. Einnig getur Póst- og fjarskiptastofnun afturkallað heimild ef um alvarlegt brot er að ræða á skilyrðum heimildar, lögum um fjarskipti, lögum um Póst- og fjarskiptastofnun, reglugerðum um fjarskipti eða reglum settum af Póst- og fjarskiptastofnun, þó ekki fyrir en viðkomandi fyrirtæki hefur verið gefinn kostur á að koma að athugasemdum sínum innan 30 daga frá tilkynningu Póst- og fjarskiptastofnunar varðandi brotið.

Komi til afturköllunar á heimild tilkynnir Póst- og fjarskiptastofnun viðkomandi fyrirtæki að það njóti ekki lengur heimildar til fjarskiptastarfsemi og fellir niður skráningu þess. Póst- og fjarskiptastofnun getur stöðvað starfsemi sem rekin er án heimildar og er heimilt að leggja á dagsektir í því skyni.

23. gr.

Skylda til að sækja um rekstrarleyfi.

Póst- og fjarskiptastofnun getur krafist þess að fjarskiptafyrirtæki sem starfar samkvæmt almennri heimild sækir um rekstrarleyfi, ef breytingar á rekstri eða aðrar aðstæður gera það að verkum að reksturinn falli undir þau tilvik sem talin eru upp í 7. gr. laga nr. 107/1999, sbr. 2. gr. reglna þessara.

24. gr.

Lög.

Um heimild þessa gilda að öðru leyti lög um Póst- og fjarskiptastofnun nr. 110/1999 og lög um fjarskipti nr. 107/1999, ásamt reglum og reglugerðum settum samkvæmt þeim eftir því sem við á.

25. gr.

Varnarþing.

Varnarþing vegna almennra heimilda til að reka fjarskiptanet eða fjarskiptaþjónustu skal vera í Reykjavík.

26. gr.

Gildistaka.

Reglur þessar, sem settar eru samkvæmt heimild í 6. gr. laga um fjarskipti nr. 107/1999, öðlast þegar gildi.

Póst- og fjarskiptastofnun, 24. janúar 2002.

Gústav Arnar.

Sigurjón Ingvason.